

ZAPISNIK
O RADU 12. RADNE SJEDNICE SKUPŠTINE KANTONA SARAJEVO ODRŽANE
24.11.2023.GODINE SA POČETKOM RADA U 08,00 SATI

Dvanaestu radnu sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Sjednici je prilikom otvaranja prisustvovalo 26 zastupnica i zastupnika, a u daljnjem toku se priključili i ostali zastupnici, kako slijedi:

SDA - STRANKA DEMOKRATSKE AKCIJE

1. Kalem Adi
2. Kapidžić Faruk
3. Selmanović Faruk
4. Viteškić Smiljana

POLITIČKA ORGANIZACIJA "NAROD I PRAVDA"

1. Čampara Aljoša
2. Kristić Danijela
3. Mehmedagić Mersiha
4. Memić Arijana
5. Okerić Elvedin
6. Pobrić Rusmir
7. Vreto Elvis

SOCIJALDEMOKRATSKA PARTIJA BOSNE I HERCEGOVINE

1. Avdić Samir
2. Čičić Davor
3. Kapo Belma
4. Pekić Jelena
5. Petrović Kristina

POLITIČKA ORGANIZACIJA GRAĐANA "NAŠA STRANKA"

1. Bešlija Vildana
2. Handžić Vibor
3. Klarić Sanela
4. Melank Miomirka

STRANKA ZA BOSNU I HERCEGOVINU

1. Bandić Muamer
2. Gavrankapetanović-Smailbegović Fatima
3. Šaljić Jasmin

DEMOKRATSKA FRONTA

1. Hašimbegović Marijela
2. Pilav Ilijaz
3. Vujović Vedrana
4. Zuhrić Albin

POLITIČKA ORGANIZACIJA/INICIJATIVA “ZA NOVE GENERACIJE”

1. Marjanović Damir

SAMOSTALNI ZASTUPNICI

1. Gaković Elza
2. Hodžić Admela
3. Lemezan Redžo

Izostanak sa sjednice opravdali su zastupnica Sebija Izetbegović i zastupnik Haris Zahiragić, dok je kašnjenje najavila zastupnica Mersiha Mehmedagić.

Nakon intoniranja državne himne, predsjedavajući je pozvao zastupnice i zastupnike da odaju počast pripadnicima Armije R BiH i MUP-a R BiH koji su dali svoje živote u odbrani od agresije na Bosnu i Hercegovinu, svako na svoj način.

Potom je uputio pozdrave zastupnicama i zastupnicima u Skupštini Kantona Sarajevo, članovima Vlade Kantona Sarajevo, svim prisutne u sali, kao i predstavnicima medija koji prate rad sjednice.

U radnom dijelu sjednice, predsjedavajući je istakao da je Prijedlog dnevnog reda 12. Radne sjednice Skupštine Kantona Sarajevo utvrdio Kolegij Skupštine sjednici održanoj dana 10.11.2023.godine.

Potom je dao Dnevni red za 12. Radnu sjednicu Skupštine Kantona Sarajevo na izjašnjavanje i isti je usvojen većinom glasova (19 „za“, 5 „protiv“ i bez glasova „suzdržan“), kako slijedi:

1. Poslanička/zastupnička pitanja inicijative i odgovori;
2. Nacrt Budžeta Kantona Sarajevo za 2024. godinu
3. Nacrt Zakona o izvršavanju Budžeta Kantona Sarajevo za 2024. godinu.

TOK SJEDNICE

Realizacija prve tačke dnevnog reda je počela u 08 sati i 32 minute.

AD – 1.

POSLANIČKA/ZASTUPNIČKA PITANJA, INICIJATIVE I ODGOVORI

Predsjedavajući je otvorio tačku dnevnog reda i naglasio da u skladu s Poslovníkom o radu Skupštine, za realizaciju ove tačke je predviđen sat vremena, te dao riječ prvoj prijavljenoj zastupnici.

Zastupnica Admela Hodžić je podnijela sljedeće (citiramo): „Podnosim inicijativu Vladi Kantona Sarajevo, Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo i KJP Toplane Sarajevo d.o.o da odmah poduzme sve potrebne aktivnosti i obezbijedi sve potrebne uslove kako bi se izvršila revizija starih postojećih ugovora o korištenju toplotne energije i zaključivanju novih ugovora sa postojećim korisnicima usluga u pogledu sadržaja ugovora, koji ugovori bi bili jednaki za buduće korisnike, a koji bi bili usklađeni sa odredbom člana 13. stav 2. Odredbi o opštim uslovima za proizvodnju, isporuku i korištenje toplotne energije u vezi sa odredbama Zakona obligacionim odnosima. Pod 2. Odmah i bez odlaganja pristupilo obradi i zadovoljavanju zahtjeva za raskid ugovora o korištenju toplotne energije i proizvodnje sa centralnog toplifikacionog sistema za sve korisnike koji zadovoljavaju usluge koji zadovoljavaju uslove propisane odredbom člana 16. Stav 3. Zakona o komunalnim djelatnostima Kantona Sarajevo, u vezi sa odredbom člana 17. I 22. Stava 2. Uredbe o opštim uslovima za proizvodnju, isporuku, korištenje toplotne energije kojim se propisuje pravo korisnika da otkáže komunalnu uslugu pod propisanim uslovima, pri čemu bi stručnu komisiju i na terenu i prilikom donošenja konačne odluke po zahtjevu učinilo stručno lice odgovarajuće mašinske struke sa liste stalnih sudskih vještaka u Federaciji Bosne i Hercegovine po izboru korisnika usluga kako bi se postigla ravnopravnost učesnika u postupku jednakosti u ugovornom odnosu po 3. Odmah i bez odlaganja prestane sa prinudnim potpisivanjem ugovora vlasnika novih nekretnina koji ugovorima prilikom kupovine nekretnine nisu uslovljeni niti jednim članom, da će u navedenom roku zaključiti ugovor o korištenju toplotne energije sa KJP Toplane Sarajevo d.o.o zbog toga što je to slobodna volja građana, izuzev ako je izvođač investitor nekretnine u ugovoru, već ranije naveo taj uslov, a kupac saglasan pošto je obrazloženje malo opširnije, ostalo ću dostaviti u pisanoj formi.“

Zastupnica Fatima Gavrankapetanović-Smailbegović je podnijela sljedeće (citiramo): „Ovim putem prema Ministarstvu zdravstva Kantona Sarajevo, podnosim sljedeću inicijativu, iniciram da se pokrenu neophodne aktivnosti i da se na porodilištu, odnosno Klinici za ginekologiju i akušerstvo Kliničkog centra Univerziteta u Sarajevu, uvede skrining na sluh kod novorođenčadi. Ova metoda se već radi na porođajnom odjelu Opće bolnice, a u Kliničkom centru, gdje je veći broj poroda se ne radi. U pravilu, skrining sluha se provodi u prvih nekoliko dana nakon rođenja. Bez neonatalnog skrininga oštećenja sluha, oštećenje sluha se otkriva tek oko druge godine života, što je kasno za pravi tretman i za liječenje. Kod ranog otkrivanja urođenog oštećenja sluha moguće je na vrijeme početi rehabilitaciju sluha i govora, što ima ogroman značaj za daljnji rast i razvoj djeteta. Također, imam dva pitanja koja upućujem ministru zdravstva dr Enisu Hasanoviću. Prvo pitanje je koliko ima odobrenih sredstava iz ranijih godina za zdravstveni sektor kapitalna ulaganja koja nisu realizovana, šta je s tim sredstvima i koliko će se čekati na realizaciju istih? I drugo pitanje da li je istina da Hitna pomoć, nakon što prisustvuje obilježavanjima važnih datuma za Kanton Sarajevo, ispostavi fakturu udruženjima koja to organizuju? Molit ću usmeni odgovor i zahvaljujem se”

Zastupnica Belma Kapo je podnijela sljedeće (citiramo): „Ja svoju prvu inicijativu upućujem Uredu premijera, odnosno Vladi Kantona Sarajevo, čisto zbog hitnosti nabavke ovih uređaja, obzirom da je Vlada Federacije, kako ste vidjeli u medijima, obezbijedila lijek Kaftrio da se konačno riješi problem djece i odraslih oboljelih od cistične fibroze. Slijedi nova epoha u liječenju ove bolesti sa modularnom terapijom, ali molim da se hitno oprema za praćenje ishoda liječenja za Pedijatrijsku kliniku Kliničkog centra Univerziteta u Sarajevu. Tu se radi o 4 uređaja koja nisu velika, nisu ni iznimno skupi, a prijeko su potrebni da bismo sada odmah čim se krene sa liječenjem, mogli da bi ljekari mogli pratiti ishod liječenja. Radi se o Portabilnom spirometru za Odjel plućnih bolesti, Pedijatrijske klinike Kliničkog centra u Sarajevu. Makrodukt, to je uređaj za određivanje florida u znoju za djecu iznad jedne godine. Iznimno je važno praćenje tog parametra tokom liječenja. Nanodukt, isto se koristi za određivanje florida ali kod dojenčadi i

mobilni ili manualni fleksibilni bronhoskop koji je isto tako potreban da bismo sada mogli kvalitetno popratiti ishod liječenja kod najmlađih. Ova sredstva nisu sigurno veća od nekih 20 000, a konvertibilnih maraka zajedno te vas molim da vidite u kojoj stavci budžeta bi se najprije mogla naći ta sredstva. Drugo je pitanje koje upućujem Kantonalnom ministru unutrašnjih poslova. Da li je rasvijetljen nemili događaj koji se desio prije dva dana vezano za napad vozača u tramvaju? Da li je to krivično odijelo ili je prekršaj, ne znam, kao kako je kvalificiran, obzirom da ovo nije prvi put, nego prelazi izgleda u praksu da se napadaju vozači gradskog prijevoza. Molim da mi kažete koje sistemski preventivne mjere i radnje poduzimate da ne bi došlo do negativnih posljedica dalje“.

Zastupnik Faruk Selmanović je podnio sljedeće (citiramo): „Imam dva pitanja i jednu inicijativu. Prvo pitanje upućujem Vladi Kantona Sarajevo. Molim da mi se odgovori koliko je zaključeno ugovora o djelu u periodu od 01.01.23. do 21.11.23.godine ukupno, kao i po ministarstvima pojedinačno i da se dostave imena osoba sa kojim je zaključen ugovor, kao i razlog zbog koga je zaključen ugovor o djelu, vremenski period na koji je ugovor zaključen, te iznosi koji su isplaćeni pojedinačno, po svakom ugovoru o djelu. Moje drugo pitanje također se upućuje Vladi Kantona Sarajevo. Koliko je zaposleno državnih službenika u istom tom periodu od 01.01.23. do 21.11.23. godine ukupno, kao i po ministarstvima pojedinačno. I inicijativu koju upućujem Ministarstvu za obrazovanje i Vladi Kantonu. U skladu sa programom rada osnovnih škola na području Kantona Sarajevo i planiranim organizacijama studijskih putovanja i ekskurzija da se planiraju sredstva u budžetu za financiranje istih, sa ciljem da svako dijete ima jednaku priliku da ode na putovanje, tj. inicijativa za besplatne ekskurzije i studijska putovanja za svu djecu u osnovnim školama.“.

Zastupnik Redžo Lemezani je podnio sljedeće (citiramo): „Za danas imam jednu inicijativu a odnosi se na digitalizaciju plaćanja novčanih kazni iz oblasti saobraćaja prema MUP-u unutrašnjih poslova. Cilj ove inicijative jeste da na MUP-ovoj web stranici unesete broj kazne i počinjeni prekršaj platite karticom, kao i ostale sve stvari koje možemo izvršiti plaćanja preko Interneta. I evo, sve je to znatno jednostavnije od čekanja u redu u banci ili pošti. S obzirom da nam naplata kazni uvijek kaska i da pored volje da neko plati prekršaj koji je počinio, trebamo minimalno da ode da plati sat vremena s obzirom na gužvu u banci i u pošti. U eri digitalizacije, online plaćanje kazni karticom u Sarajevu, predstavlja korak ka modernizaciji naših usluga. Ova inicijativa će pojednostaviti procese plaćanja i unaprijediti efikasnost. Doprinos ovoj inicijativi smanjit će administrativne barijere, čineći našu infrastrukturu još pristupačnijim građanima“.

Zastupnik Davor Čičić je podnio sljedeće (citiramo): „Ja ću danas imati dvije inicijative. Prva je prema Vladi Kantona Sarajevo, a radi se o inicijativi za izdvajanje sredstva sredstava za pomoć studentima iz Palestine koji studiraju na visokoškolskim ustanovama u Kantonu Sarajevo iz sredstava Tekuće rezerve Budžeta Kantona za 2023.godinu. U prilogu inicijative dostavljan zvanični spisak studenata koji studiraju na visokoškolskim na području Kantona Sarajevo, koje smo dobili ispred udruženja Palestinske zajednice u BiH. Inicijativu upućujem Vladi Kantona Sarajevo da iz sredstava tekuće rezerve osigura jednokratnu pomoć ovim mladim ljudima i studentima iz Palestine u iznosu koji Vlada sama procijeni da je moguće, kako bi se na ovaj način pomoglo i tim obiteljima pogođeni užasnim ratom u njihovoj zemlji. Isto tako predlažem Vladi da razmotri mogućnost, pored ove jednokratne pomoći, da u budžetu za 2024.godinu se pokuša planirati godišnje stipendiranje ovih mladih ljudi. Druga inicijativa dostavljena je prema Ministarstvu kulture i sporta Kantona Sarajevo, Zavodu za zaštitu kulturnog, historijskog i prirodnog naslijeđa Kantona Sarajevo i Ministarstvu za boračka pitanja Kantona Sarajevo, a radi se o tome da Zavod za zaštitu kulturnog, historijskog i prirodnog naslijeđa Kantona Sarajevo izradi elaborat o zaštiti kako bi se zaštitio objekat bivšeg doma penzionera Novo

Sarajevo, u Ulici Aleja lipa 56, locirana k.č. 1151 ko Novo Sarajevo 2, kao objekat značajan za kulturno historijsko naslijeđe Kantona Sarajevo. Naime, Zavod za zaštitu kulturno historijskog i prirodnog naslijeđa u Kantonu Sarajevo svoje mišljenju broj 1376/23 od 12.10.23.godine je naveo da na osnovu preliminarnog pregleda objekta i ambijenta u kojem je lociran objekat bivšeg Doma penzionera u ulici Aleja lipa 56, zaključio je da objekat posjeduje i arhitektonsku i a ambijentalnu vrijednost i da bi kao takav trebao biti sačuvan i zaštićen. U tom mišljenju je navedeno da objekat građen 60-tih godina prošlog stoljeća, kao namjenski objekat za stara iznemogla lica, izvornost i funkcija su mu jasno čitljivi i tipični su za internacionalni stil arhitekture, objekat je izuzetno skladnih proporcija, svojim položajem i smještaja u prostoru predstavlja neodvojiv segment kompozicione cjeline u urbanističkoj postavci objekta okolnog prostora. Egzistirajući u izvornom obliku, ovaj objekat je rijedak primjerak izvorno stilski sačuvane arhitekture nacrt objekata internacionalnog stila u Kantonu Sarajevo. Taj dom penzionera je bio prvi objekat takve vrste u gradu Sarajevu i Bosni i Hercegovini, tada sa 42 ležaja i javnom kuhinjom za ishranu samohranih penzionera iz grda. U vrijeme agresije na BiH i opsade Sarajevo u navedenom objektu se nalazio štab A RBiH, odakle se rukovodila odbrana Trga Heroja naselja Hrasno, a time je odbrana grada u cjelini, što mu kao takvom daje dodatnu povijesnu vrijednost objekta koji treba zaštititi radi njegovanja kulture sjećanja i kao potencijalnog spomen obilježja ili eventualnog muzeja jedinice Armije BiH koje su u njemu tokom rata boravile. Zbog toga inicijativu dostavljam Ministarstvu za boračka pitanja kako bi dali svoje mišljenje i potencijalno podržali inicijativu zaštite ovog objekta. U vezi svega navedenog, pokrećem tu inicijativu da Ministarstvo kulture i sporta naloži Zavodu za zaštitu kulturno historijskog i prirodnog naslijeđa Kantona Sarajevo da uradi neophodni elaborat u zaštiti gore navedenog objekta u što kraćem vremenskom roku i da isti elaborat dostavi Skupštini Kantona Sarajevo na nadležno odlučivanje o potencijalnom proglašenju ovog objekta od kulturnog historijskog značaja za Kantona Sarajevo.”

Zastupnica Smiljana Viteškić je podnijela sljedeće (citiramo): „Ja imam jednu inicijativu koju mi je dostavio Aktiv nastavnika kulture življenja. Znači, Vlada Kantona Sarajevo donijela je Odluku o izmjeni Odluke o pedagoškim standardima i općim normativima za osnovni odgoj i obrazovanje i normativima radnog prostora, nastavnih sredstava i učila po predmetima za osnovnu školu. Odluka se odnosi na nastavni predmet kultura življenja gdje se ukida podjela učenika u grupe koja je uvijek bila zastupljena u nastavnom planu i programu. Ovom Odlukom nastavnici kulture življenja su izgubili normu, došli su u situaciju da idu od škole do škole, da ispune normu, djeca su izgubila jedan od najdražih i najpotrebnijih predmeta u školi. Nastavni predmet kultura življenja ne može se realizovati onako kako dolikuje ako nema grupe i 2 časa sedmično. Da ne ponavljam, svi znamo koliko je predmet kultura življenja širok i zanimljiv i da je neophodan za učenika, školu, pa i širu društvenu zajednicu. Svjedoci smo da u posljednje vrijeme ministrica daje i akcenat na zdravu ishranu sa školsku djecu, da je svjesna koliko je neophodno znanje i odgovarajući kadar da prenesu učenicima važnost odijevanja, stanovanja, ishrane, a sve to posjeduju nastavnici kulture i življenja jer su se za to i školovali. Došlo se u situaciju kada u školama svi drugi profili, krenuvši od razredne nastave, tjelesnog odgoja, likovne kulture više se bave nastavnim planom kulture življenja nego svojim. U školama jedino nastavcima kulture življenja oduzeto je pravo da rade ono za zašto su se školovali. Nastavnici kulture življenja traže da se ovaj problem vrati na dnevni red Vlade i da se razmotri Odluka Vlade da se u škole vrati bar u petom razredu dva časa sedmično, tj da se učenici dijele u grupe i omogući im se rad praktičnih vježbi. Pisani odgovor, izvinjavam se. Molim pisani odgovor”.

Zastupnica Sanela Klarić je podnijela sljedeće (citiramo): „Ja za danas imam dvije inicijative. jedna se odnosi upućujem je Vladi Kantona Sarajevo, zajedno sa ministarstvima komunalne privrede i infrastrukture, prostornog uređenja, građenja, okoliša, Ministarstvu privrede i Ministarstvu kulture i sporta, Gradu Sarajevu i svim opštinama. Radi se o našoj tradiciji i

procjeni oživljavanja tradicije javnih česmi u Kantonu Sarajevo. Ono što je važno reći jeste da je 2010. godine UN proglasio pravom na čistu vodu ljudskim pravom. Mi to pravo baštinimo stoljećima u Kantonu Sarajevo i nismo svjesni šta imamo. Javne česme predstavljaju dio tradicije, jednostavno su u damarima naših ljudi i u razgovorima sa građanima Kantona Sarajevo svi su svjesni da smo ih nekako od 2007. godine, kada se samo Uredbom pokušalo riješiti ovo pitanje i ingerenciju prebaciti na Grad Sarajevo, ustvari smo izgubili jedan kontakt sa tim česmama. Veliki broj njih je jednostavno nestalo, a s druge strane one koje su trenutno u funkciji, 30 % njih uopšte nije u funkciji. Šteta je da jedno ovakvo pitanje, važno pitanje za Kanton Sarajevo, rješavamo kroz projekte gdje su iz udruženja mapirali ove česme, međutim, važno je da sada mi na jedan suštinski način napravimo finansijsku procjenu i riješimo strateški pitanje ovih česmi jer na taj način možemo brendirati naš Kanton, a s druge strane, ako govorimo o okolišu, definitivno možemo učiniti jako puno i da smanjimo plastični otpad i da brendiramo naš grad kao grad čiste vode. Također, pored ove inicijative Vladi Kantona Sarajevo, Ministarstvu saobraćaja, Direkciji za puteve i Ministarstvu za komunalnu privredu i prostorno planiranje također šaljem inicijativu da implementiramo Plan održive mobilnosti Kantona Sarajevo koji je usvojen 2020. godine. Hrabro idemo i čestitam Ministarstvu saobraćaja na svemu što se radi na rješavanju pitanja javnog prijevoza. Međutim sada je vrijeme da hrabro i kažemo da li ovaj grad projektujemo i dizajniramo i planiramo za automobile ili za naše građane, za naše komšije, za našu djecu. Veliki broj automobila od 150 000 u odnosu na 300 000 stanovnika ne smije biti osnovno pravo i pitanje rješavanja automobila u gradu. Mi moramo rješavati pitanje nas, građana, u samom gradu i sada pošto imamo ovaj strateški plan, ja hrabro pozivam naše ministre i Vladu Kantona Sarajevo da počnemo pilotirati one ulice i one prostore u gradu Sarajevu gdje ćemo te prostore dizajnirati prema našim zahtjevima građana, smanjit ćemo zagađenja, kako zraka, tako i buke i jednostavno ćemo odgovoriti na ono što je sam Kanton Sarajevo potpisivanjem projekta Hundred City da postanemo grad koji je do 2030. godine dekarbonizovan. Znači sa ovom inicijativom to možemo staviti na raspolaganje“.

Zastupnica Vedrana Vujović je podnijela sljedeće (citiramo): „Ja imam jednu zastupničku inicijativu i jedno pitanje. Upućujem inicijativu za hitnu sanaciju stepeništa na Ciglanama u Husrefa Redžića na Avde Hume na molbu građana naselja Ciglane u Opštini Centar koji se svakodnevno kreću neprohodnim stepeništem između ulica Husrefa Redžića i Avde Hume upućujem inicijativu za hitnu sanaciju istih kako bi se izbjegle nesreće, padovi i lomovi. Imajući u vidu da idemo u susret zimskoj sezoni, odnosno da se adekvatno uredi prohodnost za pješake. Inicijativu podnosim sa nivoa Kantona Sarajevo, načelniku Opštine Centara, na molbe građana ne odgovara mjesecima i ne poduzima ništa po ovom pitanju. I zastupničko pitanje upućujem odnosi se na Ministarstvo za rad, socijalnu politiku, raseljena lica i izbjeglice Kantona Sarajevo. U kojoj je fazi projekat izrade socijalne karte u Kantonu Sarajevo? Uz ovaj odgovor koji tražim usmeno odgovor, međutim ministrica nije tu, tako da može i pismeno, tražim detaljan izvještaj o projektu, metodologiji prilikom izrade, učesnicima, ekspertima i dosadašnjim troškovima, te u konačnici kada bi socijalna karta mogla je biti gotova i prezentovana javnosti“.

Zastupnica Marijela Hašimbegović je podnijela sljedeće (citiramo): „Za današnju sjednicu pripremila sam dvije inicijative i dva pitanja. Prezentirati ću jednu inicijativu. Upućujem inicijativu radi zaštite naše kulturne baštine i hitnog obezbjeđenja osnovnih uslova za djelovanje JU Historijski arhiv Sarajevo, koji se tiče adekvatnog prostora na svim standardima za smještaj arhivske građe koja je povjerena Arhivu na čuvanje. JU Historijski arhiv Sarajevo prikupljaju i čuva dobro kulturne baštine i obzirom na njenu važnost i značaj za Kanton, kao i Bosnu i Hercegovinu, pitanje uslova u kojima Arhiv radi i djeluje, kao i uslova u kojima se pohranjuje arhivska građa, mora se posvetiti posebna pažnja. Obzirom da je ovo pitanje prevazilazi nadležnosti direktorice JU Historijske arhiv Sarajevo nalažem da Ministarstvo kulture i sporta uradi sljedeće: uključi i druge institucije kulture ili druge kantonalne institucije koje imaju kapacitete za izradu predmjera i

predračuna potrebnih radova u svrhu pribavljanja financijskog plana vezanog za sanaciju postojećeg objekta na Vrbanjuši, Čadordžina 90 ili za rušenje i izgradnju novog objekta na istoj lokaciji. Financijski plan je neophodan za realizaciju ovog projekta i planiranja potrebnih aktivnosti. U saradnji sa Ministarstvom za nauku, visoko obrazovanje i mlade obezbijedi novi prostor u Kampusu orijentaciono kvadrature 2000 m², koji bi se trebao koristiti kao depo za arhivsku građu koja se treba preuzeti u narednom periodu, kako je propisano Zakonom o arhivskoj djelatnosti Kantona Sarajevo. Obzirom da su trenutno popunjeni smještajni kapaciteti, nakon Odluke vezano za pristup rješavanja statusa zgrade Čadordžina 90, potrebno je obezbijediti i sredstva i pristupiti aktivnostima sanacije, rušenja ili izgradnje novog objekta. Zgrada u ulici Čadordžina 90, u kojoj je smještena arhivska građa, nalazi se u fizički lošem stanju, sa brojnim oštećenjima uslijed raznih okolnosti; slijeganje tla i slično, i kao takva, ugrožava sigurnost lica i imovine, ujedno i naše nematerijalne kulturne baštine. Građevinski fakultet Univerziteta u Sarajevu izradio je stručni nalaz o građevinsko- konstruktivnom stanju zgrade i koji potvrđuje da zgrada ne zadovoljava ni minimalne uvjete za tu namjenu, a naročito ne zadovoljava zahtjeve savremenih europskih propisa. Predmetna zgrada u takvom stanju zahtjeva detaljnu sanaciju i pojačanje cijelog objekta. Stručni nalaz također definiše izbor rušenja objekta i opciju izgradnje novog objekta, uz naznaku vrijednosti objekta u kontekstu vremena nastajanja. Zakonom o arhivskoj djelatnosti propisan je rok predaje arhivske građe koji iznosi 30 godina, a ukoliko je arhivska građa ugrožena, mora se preuzeti i ranije. Arhivska građa Ministarstva unutrašnjih poslova Kantona Sarajevo, Općinskog suda u Sarajevu, Kantonalnog suda u Sarajevu, Kantonalnog tužilaštva u Sarajevu, dospjela je na predaju. Preuzimanje ratne građe regulisano je odredbama navedenog Zakona do kraja 2021 godine. Zbog navedenog problema smještajnog prostora Arhiv nije bio mogućnosti da preuzme predmetnu arhivsku građu. Ostalo možete pročitati u inicijativi“.

Zastupnik Albin Zuhrić je podnio sljedeće (citiramo): „Ja imam jednu zastupničku inicijativu za sazivanje tematske sjednice Skupštine Kantona Sarajevo u roku od 30 dana, u skladu sa članovima 64 i 67 Poslovnika Skupštine, u okviru koje bi se vodila rasprava i utvrdilo stvarno stanje dodjele sredstava za održivi povratak u Republiku Srpsku iz Budžeta Kantona Sarajevo s razdjela Kabineta predsjedavajućeg i zamjenika predsjedavajućeg Skupštine Kantona Sarajevo, kao i cjelokupnoj praksi dodjele sredstava budžetskim korisnicima, a za koju bi nosilac pripreme bila Vlada Kantona Sarajevo zbog sukoba interesa predsjedavajućeg Skupštine. Ja ću dati samo kratko obrazloženje. Pismo ste dobili svi u Skupštini. Mi smatramo kako je ono što je izašlo u medijima o dodjeli sredstava organizacijama koje su vrlo precizno i jasno vezane isključivo za jednu političku partiju samo jedan djelić onoga što se dešava u Kantonu Sarajevo i ovdje, vjerovali ili ne, predsjedavajući, ne mislim samo na vas, nego i na druge političke opcije kroz sve ove godine, jer je problem što imamo netransparentan sistem u kojem je skoro pa nemoguće čak i zastupnicima doći do podataka koje organizacije primaju novac, mi bismo morali pojedinačno tražiti od svakog ministarstva, Vlade i predsjedavajućeg kome su dodjeljivali novce, dakle istraživati, iako smo se hvalili u ovoj Skupštini registrom po kojem možete vidjeti koliko čistačice novca primaju. Ova sjednica bi bila važna kako bi konačno utvrdili koje su organizacije primali novce i šta će ova Skupština uraditi da se to ne ponavlja. I vi slobodno predsjedavajući, dođite sa dokazima da ove stvari koje su se pojavile u javnosti, ove informacije nisu tačne. Ja vas čak pozivam da istražite i iz prethodnih Vlada djelovanje zastupnika i funkcionera Demokratske fronte i nama će biti drago da vidimo jel ima i takvih koji su dodjeljivali novce nekim stranačkim organizacijama, da ih izbacimo iz partije, ali je neophodno da se ova tematska sjednica održi. Ja ću tražiti da se Skupština izjasni o ovom pitanju danas“.

Zastupnica Vildana Bešlija je podnijela sljedeće (citiramo): „Ja bi imala inicijativu jednu koju ću evo, pročitati, odnosi se, odnosno upućujem je prema Vladi Kantona Sarajevo, a tiče se donošenja zaključka kojim se pokreće procedura izrade Uredbe o procjeni utjecaja propisa Kantona Sarajevo. Na osnovu izvještaja revizije učinka rodna ravnopravnosti i sprečavanje nasilja

nad ženama koji obuhvata sve kantone, dostavljenog od strane Ureda za reviziju institucija u Federaciji Bosne i Hercegovine prema Vladi Kantona Sarajevo i Komisiji za rodnu ravnopravnost Kantona Sarajevo, navedene su određene preporuke. Između ostalog, navedeno je da je neophodno da Kantonalni organi uprave sve propise i druge akte iz svoje nadležnosti prije upućivanja u zakonsku proceduru dostavljaju na mišljenje institucionalnim mehanizmima za ravnopravnost spolova radi usuglašavanja sa odredbama Zakona o ravnopravnosti spolova u Bosni i Hercegovini. Također, u ovom izvještaju se navodi da Federalna uredba o procjeni utjecaja propisa nije dovoljno razrađena, naročito u dijelu koji se odnosi na rodnu ravnopravnost. S tim u vezi, neophodno je da Vlada Kantona Sarajevo donese zaključak kojim se pokreće procedura izrade Uredbe o procjeni uticaja propisa Kantona Sarajevo u ovom smislu“.

Zastupnik Adi Kalem je podnio sljedeće (citiramo): „Ja imam par pitanja za Vladu Kantona Sarajevo a tiču se da li je Vlada Kantona Sarajevo razmatrala inicijativu o dovoljnom broju kemoterapija za pacijenta oboljele od karcinoma koju sam podnio na prethodnoj sjednici? Također, interesuje me, obzirom da smo usvojili određene zaljučke na Tematskoj sjednici povodom sigurnosti u saobraćaju, kada možemo očekivati informaciju o realizaciji istih. I ako su se poduzele određene mjere, volio bih da me upoznate o efektima. Naravno, ono što može usmeno, usmeno, što ne može, odnosno detaljnije može i pismenim putem. Također sam htio postaviti pitanje, tragom inicijative kolegice Klarić vezano za SUMP, odnosno Plan urbane mobilnosti u Kantonu Sarajevo, kada možemo očekivati realizaciju ovog Plana? Da li su do sada poduzeti određeni koraci i da li je u izradi dinamički plan? Ukoliko je u izradi, volio bih da nam se isti dostavi. I vezano za ovo zagađenje zraka u Kantonu Sarajevo, šta će Vlada Kantona Sarajevo uraditi po pitanju zagađenosti zraka, obzirom da je Sarajevo jedan od najzagađenijih gradova u Svijetu i ukoliko postoji određeni akcioni plan ili koraci koje su poduzeli, molio bih da danas upoznaju sa tim.“

Zastupnica Elza Gaković je podnio sljedeće (citiramo): „Ja ću imati par kratkih pitanja prema Ministarstvu komunalne privrede i infrastrukture, prostornog uređenja, građenja i zaštite okoliša. Da li se do kraja oktobra mjeseca tekuće godine treba realizirati projekat toplifikacije općine Vogošća. Da li su sredstva iz MMF-a bila osigurana? Ako jesu, u kom iznosu su bila? Da li je urađena studija izvodljivosti daljinskog grijanja, osigurana od strane EBRD-a za navedeni projekat? Ko je radio tu studiju? Ako je trebao biti završen projekat do mjeseca oktobra u ovoj godini zašto nije okončan i kolika je šteta za Kanton Sarajevo? Molim vas samo pisani odgovor.“.

Zastupnica Mimirka Melank je podnijela sljedeće (citiramo): „Leopold Klemens registrovan je za Željezničar 1927. godine, rođen je 1910 umro 1967.godine. Njegov brat Alojz je odigrao 18 utakmica za Željezničar. Leopold Klemens je sahranjen na groblju Bare, grob je u lošem stanju, a kako niko ne plaća grobarinu za mjesto sahrane, grob će vjerovatno u budućnosti biti, u bliskoj budućnosti biti prekopan. Pravilnik o raspolaganju grobnim mjestima Pokopa, Kantonalnog javnog preduzeća Pokop Sarajevo za sahrane, kaže da napušteno grobno mjesto u smislu ovog Pravilnika je ono koje se 10 godina uzastopno uredno ne održava ili za koje se 10 godina uzastopno ne plaća naknada za korištenje grobnog mjesta. Slična situacija za poređenje može biti navedena kakva je u Britaniji. U Britaniji, naime, vlada veliki nedostatak prostora za sahrane. Oni su pronašli soluciju da grobovi odabrani za ponovno upotrebu moraju biti stari najmanje 75 godina, a obavještenje se postavlja na nadgrobni spomenik i oglasima godinu dana prije toga. Ako postoji prigovor, grob će ostati netaknut. Smatram da se uklanjanje grobnih mjesta sa tako kratkim rokom od 10 godina u našem Pokopu briše istorija grada, uklanjaju se grobovi koji čine našu baštinu, na određeni način uklanjaju se imena ljudi koji su nekada ovdje živjeli, mogu biti određeni grobovi proglašeni spomenicima kulture i tako se spriječiti proces uklanjanja ili, ako su pokopane značajne istorijske ličnosti, ali ti kriteriji o proglašenju značajnih ličnosti također ne postoje, pa se ljudi poput Klemensa, pa će ljudi poput Klemensa i njihova grobovi biti uklonjeni u zajedničku grobnicu. I stoga iniciram promjenu ovog Pravilnika i tražim da se rok za,

produži rok za održavanje te da on ne bude samo 10 godina, nego značajno duži. Ja sad nisam sigurna da li je dovoljno da bude duplo duži, ali sam sigurna da će na ovaj način naša baština biti bogatija ako grobovi ljudi koji su ovdje živjeli ostanu na svojim mjestima u dužem vremenskom periodu.“

Zastupnik Vibor Handžić je podnio sljedeće (citiramo): „Ja ću jako kratko reciklirati dvije stare inicijative. U februaru mjesecu sam poslao inicijativu prema Upravi policije i Ministarstvu saobraćaja vezano za postavljanje znakova "škola u blizini", ograničavanje brzine kretanja u ulici Alipašina kod broja 41. To je ovaj prijelaz između ul. Sutjeska na drugu stranu i dobio sam zaista odgovor od Ministarstvu saobraćaja. Oni su ovu inicijativu u aprilu uputili na ceste Federacije koje upravljaju ovom saobraćajnicom, međutim ništa se od tada nije desilo. Ja sada molim da se pošalje dodatna urgencija, a ja ću iskoristiti također činjenicu da sam delegat u Domu naroda, da ovo isto tražim, jer evo, i prije dva dana smo imali tešku saobraćajnu nesreću, upravo na tom dijelu, jedno se vozilo zabilo u stub ovaj preko puta. I samo je zaista pitanje dana kada će se neka od tih nesreća završiti sa tragičnim posljedicama, pa ćemo ovdje opet imati neke tematske sjednice i preuzimati odgovornost za sebe. Ovo je zaista ogroman problem i evo, molim Ministarstvo da pošalje još jednu urgenciju, a i ja ću lično to uraditi kao delegat u Domu naroda Parlamenta Federacije. Također, podnio sam inicijativu vezano, a na zahtjev Savjeta Mjesne zajednice za postavljanje signalizacije i stacionarnog radara kod škole Stari Ilijaš. Dobio sam odgovor od ekspertne radne grupe koja radi procjenu o tome da li je potrebno postavljati radare, da nije opravdana moja inicijativa i ja jesam u inicijativi naveo da tamo postoje zaista i usporivači i oznaka da je škola u blizini, međutim, ja imam pravo, pravo, zahtjev i od Vijeća roditelja i od Savjeta Mjesne zajednice, to su ljudi koji tamo žive i borave i djeca im idu u tu školu i svakodnevno posmatraju kretanje vozila u tom području, da još jednom ekspertna grupa razmotri ovo pitanje, jer ja sam dobio odgovor da ako se saobraćajna situacija pogorša, da će se razmotriti uvođenje ove mjere. Međutim ja mislim da mi moramo djelovati preventivno i ne smijemo dozvoliti da se saobraćajna situacija pogorša. I evo, molim, zaista upućujem ponovo inicijativu ekspertnoj grupi da još jednom razmotri realizaciju ove inicijative. ”

Zastupnik Jasmin Šaljić je podnio sljedeće (citiramo): „Kao zastupnik u Skupštini Kantona Sarajevo i zaštite građana Kantona Sarajevo, upućujem za zastupničku inicijativu prema Vijeću grada Sarajeva, odnosno prema Gradskom vijeću, da preispituju Odluku iz jula mjesec ove godine o dodjeli novoizgrađenog objekta izletišta Vidikovac na korištenje određenim IT firmama. Neka te IT firme naprave sebi objekat. Kao zastupnik u Skupštini Kantona Sarajevo dužnost mi je da vas upozorim da ste ovom odlukom o dodjeli Vidikovca nama građanima Sarajeva , kao i turistima koji dođu žičarom na Trebević kompletnu posjetu jedinom ugostiteljskom objektu u Federaciji gdje mogu da se zadrže i osveže uz pogled na Sarajevo. Sljedeći ugostiteljski objekat je na Brusu, koji je administrativno u identitetu RS. Ovom odlukom se ide na ruku ugostiteljima iz RS-a jer bi na ovaj, jer bi im ovaj objekat bio konkurencija. Apeluje na Gradsko vijeće da ovu odluku razmotri i poništi i odnosno stavi van snage. Osim toga, izletišta Vidikovac pripada građanima Sarajeva i svima onima koji u dobroj namjeri posjete naše olimpijsko Sarajevo. Napominjem vas gradske vijećnike, kao i kabinet gradonačelnice Karić, da je donator za gradnju žičare donirao dio novca za izgradnju izletišta Vidikovac sa isključivim uslovom da ostane na kompletno korištenje građanima Sarajeva. Ako ne poništite odluku, onda je slobodno dodijeliti i žičaru, neka im je u kompletu. Imam jednu inicijativu prema Kabinetu Skupštini Kantona Sarajevo Sarajevo, da se nama zastupnicima u Skupštini Kantona Sarajevo dostavi cjelokupna dokumentacija, a koja je vezana za dodjelu sredstava za održivi povratak iz Kabineta predsjedavajućeg Skupštine Kantona Sarajevo. Tražim izjašnjenje Skupštine jer inicijativa ne zahtjeva novčana sredstva. Danas. Evo dostavit ću, ja sam je pročitao, pa ću je kontam dostaviti“.

Zastupnik Muamer Bandić je podnio sljedeće (citiramo): „Imam pitanje za ministra saobraćaja. Jedan broj bivših uposlenika Javnog komunalnog kantonalnog preduzeća Gras

Sarajevo ima ih oko 120. Još od prije 9 godina oni su dobili rješenje o prestanku radnog odnosa jer su navršili 65 godina života, ali im nisu uplatili doprinose za 9 godina. Među njima su invalidi, a ima i onih koji ostvaruju porodičnu penziju. U Grasu ih tretiraju kao penzionera sa nepovoljnom penzijom, svi ostali penzioneri, njih oko 600 su riješeni po Programu za zbrinjavanje, dok ovih oko 74 ukupno koji su preostali, nisu dobili trajna rješenja o penzionisanju. Među tim ljudima ima i onih koji su nas napustili, koji nisu više među živima, u ovom broju, tako da bih evo zamolio ministra, ukoliko može, da mi odgovori u kojem vremenskom periodu se planira isplatiti i kako se planira ustvari riješiti ovo pitanje onih bivših zaposlenika Grasa koji su, dakle na jedan od ovih načina penzionisani?"

Nakon iscrpljene liste prijavljenih za pitanja i inicijative, predsjedavajući se zahvalio zastupnicama i zastupnicima na postavljenim pitanjima, i pozvao ministre da ponude odgovore na pitanja za koje je tražen usmeni odgovor zastupnicima Fatimi Gavrankapetanović-Smailbegović i Muameru Bandiću.

Svoje odgovore na postavljena pitanja su ponudili: Enis Hasanović, ministar zdravstva, Adnan Šteta, ministar saobraćaja, premijer Nihad Uk, Admir Katica ministar unutrašnjih poslova, Kenan Magoda ministar kulture i sporta.

Po zaključivanju diskusije, predsjedavajući je kazao da imaju dvije slične inicijative od zastupnika Zuhrića i Šaljića ali da se o njima Skupština ne može izjašnjavati dok se ne dobiju potpune informacije od nadležnih ustanova koje trenutno provode nadzor po ovom predmetu, o čemu će zastupnici biti blagovremeno obaviješteni.

Zatim se prešlo na realizaciju tačke dva.

AD-2.

NACRT BUDŽETA KANTONA SARAJEVO ZA 2024.GODINU

Zastupnici su materijal dobili uz poziv za sjednicu.

U uvodu se obratio ministar finansija, Afan Kalamujić, koji je kazao da nije učestvovao u pripremi predloženog Nacrta Budžeta, te da će isti pretrpiti značajne izmjene do Prijedloga i pozvao je sve zainteresirane da dostave svoje prijedloge i sugestije kako bi kreirali što kvalitetniji Budžet KS za narednu godinu.

Premijer Nihad Uk se u ime Predlagača obratio prisutnima i podnio uvodna izlaganja.

Predsjedavanje sjednicom je nakratko preuzela dopredsjedavajuća Jelena Pekić.

Stavove stalnih radnih tijela Skupštine Kantona Sarajevo podnijeli su: Davor Čičić u ime Komisije za budžet i finansije, Faruk Kapidžić u ime Komisije za boračka pitanja i Sanela Klarić u ime Komisije za poljoprivredu, šumarstvo, vodoprivredu i prehrambenu industriju.

Pitanja za Predlagača ima li su zastupnici: Danijela Kristić, Smiljana Viteškić, Faruk Selmanović, Marijela Hašimbegović, Fatima Gavrankapetanović, Vedrana Vujović, Rusmir Pabrić, Jasmin Šaljić, Adi Kalem, Admela Hodžić, Faruk Kapidžić, Samir Avdić, Elvis Vreto i Muamer Bandić.

Odgovore na postavljena pitanja zastupnika dali su: Omer Osmanović, ministar za boračka pitanja, Admir Katića ministar unutrašnjih poslova, Enis Hasanović, ministar zdravstva, Zlatko Mijatović, ministar privrede, Darja Softić-Kadenić, ministrica pravde i uprave, te premijer Nihad Uk.

Nakon odgovora koje su ponudili resorni ministri i premijer, dopredsjedavajući Vibor Handžić, koji je u međuvremenu preuzeo predsjedavanje sjednicom, je konstatovao da su većinom glasova zastupnici izglasali pauzu za ručak.

NASTAVAK NAKON PAUZE

U nastavku nakon pauze predsjedavajući Okerić je dao riječ ministrima da odgovore na preostala pitanja zastupnika, te su to učinili: Adna Mesihović, ministrica za nauku, visoko obrazovanje i mlade, Nuriya Hodžić, pomoćnik ministrice za rad, socijalnu politiku, raseljena lica i izbjeglice, Enda Pavić-Pečenković, Bojan Bošnjak, ministar komunalne privrede, infrastrukture, prostornog uređenja, građenja i zaštite okoliša, Naida Hota-Muminović, ministrica za odgoj i obrazovanje i Afan Kalamujić, ministar finansija.

U međuvremenu, predsjedavanjem sjednice su se izmijenjivali Vibor Handžić i Jelena Pekić.

U otvorenoj diskusiji riječ su uzeli zastupnici: Smiljana Viteškić, Marijela Hašimbegović, Vedrana Vujović, Faruk Selmanović, Faruk Kapidžić, Jasmin Šaljić, Muamer Bandić, Adi Kalem.

Nakon što je zaključio diskusije, dopredsjedavajući Vibor Handžić je dao polusatnu pauzu na zahtjev zastupnika Faruka Selmanovića.

NASTAVAK NAKON PAUZE

U nastavku nakon pauze predsjedavajući Okerić je konstatovao da su diskusije zaključene, te je predložio da Skupština po Nacrtu Budžeta Kantona Sarajevo za 2024. godinu donese sljedeće zaključke:

1. Utvrđuje se Nacrt Budžeta Kantona Sarajevo za 2024.godinu.
2. Javna rasprava održat će se u kantonalnim organima uprave, jedinicama lokalne samouprave, kantonalnim ustanovama i javnim preduzećima, i trajat će 15 dana.
3. Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu.
4. Vlada Kantona Sarajevo je dužna da nakon provedene javne rasprave podnese Skupštini Izvještaj o rezultatima javne rasprave koji sadrži primjedbe, prijedloge i mišljenja, kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga Budžeta Kantona Sarajevo za 2024.godinu.

Na osnovu rezultata glasanja, predsjedavajući je konstatovao da je Skupština podržala predložene Zaključke, s 19 glasova „za“, 3 „protiv“ i 2 „suzdržana“ glasa.

Realizacija tačke tri.

AD-3.

NACRT ZAKONA O IZVRŠAVANJU BUDŽETA KANTONA SARAJEVO 2024. GODINU

Zastupnici su materijal za ovu tačku dobili uz poziv za sjednicu, te su se usmeno izjasnili da nije potrebno uvodno izlaganje Predlagača.

Obzirom da nije bilo prijavljenih zastupnika za postavljanje pitanja, predsjedavajući je otvorio diskusiju u kojoj je učestvovao zastupnik Faruk Kapidžić.

Pošto je iscrpljena diskusija, predsjedavajući je zaključio raspravu i predložio da Skupština po Nacrtu zakona o izvršavanju Budžeta Kantona Sarajevo za 2024.godinu, donese sljedeće Zaključke:

1. Utvrđuje se Nacrt zakona o izvršavanju Budžeta Kantona Sarajevo za 2024.godinu;
2. Javna rasprava održat će se u kantonalnim organima uprave, jedinicama lokalne samouprave, kantonalnim ustanovama i javnim preduzećima i trajat će 15 dana.
3. Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu.
4. Vlada Kantona Sarajevo je dužna da nakon provedene javne rasprave podnese Skupštini Izvještaj o rezultatima javne rasprave koji sadrži primjedbe, prijedloge i mišljenja, kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga Zakona o izvršavanju Budžeta Kantona Sarajevo za 2024.godinu.

Na osnovu rezultata glasanja, predsjedavajući je konstatovao da su predloženi Zaključci podržani većinom glasova, s 19 glasova „za“, 3 glasa „protiv“ i 2 glasa „suzdržana“.

U povodu Dana državnosti Bosne i Hercegovine, predsjedavajući je, u ime Skupštine Kantona Sarajevo i u svoje lično ime, uputio prigodnu čestitku svim Bosancima i Hercegovcima u zemlji i u svijetu.

Predsjedavajući je potom zaključio rad na 12. Radnoj sjednici i zahvalio se zastupnicima na prisustvu.

Broj: 01-04-48426/23
24.11.2023.godine
SARAJEVO

Zapisnik izradila:

Lejla Kadrić

SEKRETAR
SKUPŠTINE KANTONA SARAJEVO

Aida Zeković

PREDSEDAVAJUĆI
SKUPŠTINE KANTONA SARAJEVO

Elvedin Okerić